

MERHUM HADŽI MEHMED EF. HAFIZKADIĆ

(GLASNIK VRHOVNOG ISLAMSKOG STARJEŠINSTVA U FNRJ, XII/4-6, 1961., 238-239)

Hafiz Ibrahim Mehinagić



DANA 18. JUNA 1959. – 12. ZUL-HIDŽETA 1378. U ČETVRTAK – preselio je na ahiret Hadži Mehmed ef. Hafizkadić u bolnici “Edžjad” u Mekki od sunčanice.

Merhum starinom potječe iz ugledne ilmijanske porodice Hadžića iz Gračanice. Njegov djed Hafiz Mehmed ef. Hadžić učio je hfz. i nauke od čuvenog muderisa u Gradačcu šejh H. Hasan ef. Muslimovića, čiji se mezar, ograđen željeznom ogradom i sa sačuvanim nišanima, nalazi niže Husejn kape-tanove džamije u Gradačcu, a po čijem je imenu prozvana i česma u blizini njegova mezara “Hadžefendina voda”. Tradicija govori, da je on tu vodu pronašao i nad njom česmu izgradio. I kada sve vode u okolini presuše, tom se česmom i njenom pitkom vodom služi stanovništvo Gradačca. Svršivši nauke muderis mu vjenča kćer Zumretu i odasla ga u Istanbul gdje položi kadijski ispit. Potom je službovao kao kadija u Sjenici i Novom Pazaru, a zatim u rodnom mjestu Gračanici. Tu ga zateče okupacija Bosne po Austrougarskoj. Ne htijući služiti okupatoru bješe premješten u Čanakal kraj Istanbula, gdje je službovao kao kadija sve do svoje smrti. Tu je i sahranjen. Njegova udova, kći šejh H. Hasan ef., povratila se sa sinom u Gračanicu na posjed preminulog muža. Njihov sin jedinak – merhumov otac – Hafizkadić Ibrahim ef., koji dobi prezime po ocu “Hafizkadiji”, pripadaše ilmijanskom staležu ali nije vršio nikakvu vjersko-prosvjetnu službu, već je živio obrađivajući i koristeći svoj posjed.

Rahmetli H. Mehmed ef. je rođen 7. juna 1902. g. Po završetku nauka u Osmankapetanovoj medresi u Gračanici

pred H. Mustafa ef. Šiljićem bješe g. 1929. naimenovan mualimom na ženskoj ibtidaiji u Gračanici. Tu je službu vršio dugi niz godina, a bio je i vjeroučitelj na osnovnoj školi. U službi je bio neobično marljiv i savjestan i pokazivao odlične uspjehe. Lijepe naravi, odgoja i ponašanja bio je uzor po svojoj radinosti, čestitosti i društvenom ophođenju. Stoga je kod svijeta, a naročito kod kolega bio vrlo cijenjen i poštovan. Od unazad više godina vruća mu je želja bila da obavi dužnost hadža. U to ime nekoliko godina je molio dozvolu za odlazak i dobivši je odlazi na put pun veselja i oduševljenja. I baš kada je u punoj fizičkoj i duhovnoj snazi izvršio obrede hadža, treći dan kurban-bajrama zadesi ga u Meki mukerremi nenadana smrt od sunčanice. Kao da ga je neka viša sila vukla da dođe na to sveto mjesto i da legne u mezar u blizini Bejtullaha. Allah rahmet ejle!

Uzgred spomenimo ovdje još i ovo:

Gradačacki muderis šejh H. Hasan ef. Muslimanović (rodом iz sela Rašljeve – Tuzla) bješe muderis i Hadži Muhamed Hafiz ef. Korkutu, sinu “Sidog muftije” Derviš Mehmed ef. iz Travnika, od koga potječe čuvena ilmijanska porodica travanj-skih “Korkuta”. Sidi muftija “je svog sina Muhameda s naročitom namjerom odaslao u Gradačac da uči nauke i da primi “derviško terbijе” od šejh H. Hasana ef. Po svršetku nauka vrati se u Travnik. gdje uživaše ugled velikog alima i pobožnjaka, a narod ga poznašе pod imenom “Munla efendija”. Porodica Korkuta poštujući tradiciju i dandanas često posjećuje mezar šejh Hasan ef.

cijeneći fadilet, koji je njihov predak poprimio od svoga šejha i muderisa.

Pred rečenim šejh H. Hasan ef. učio je nauke i gradačacki muftija Hadži hafiz Ahmed ef. sin hadži Osmanov (rodом iz Biberova polja – Gradačac), koji ujedno bješe muderis “Svirac” medrese u Gradačcu pa je po tome prozvan “Svirac”. Od nje potječe poznata ilmijanska porodica “Muftići” u Gradačcu. Punih pedeset godina, on je bio muderis na toj medresi. Iza njegove smrti dužnost muderisa preuzeo je njegov najstariji sin hfz. Ahmed ef. pa je i on pedeset godina tu bio muderis. Mnoga taleba kroz taj dugi period vremena koristila je njegovu veliku učenost i njegovu vanredno uspješnu metodiku predavanja. Iza njegove smrti muderisku dužnost na toj medresi vršio je njegov mlađi brat hfz. Muhamed ef. sve do svoje smrti.

Muftija “Svirac” imadašе brata Munla Ibrahima, čiji sin hadži Osman ef. Munlaibrahimović, svršivši nauke u Istanbulu, dug niz godina obavljаше dužnost muderisa na Osman-kapetanovoj medresi u Gračanici. Iza njegove smrti tu dužnost preuzeo je hfz. Mehmed Teufik ef. Okić, rodом Jajčanin, istanbulski student, koji kasnije bješe izabran za člana Ulema medžlisa i zamjenika Reis-ul-uleme. Njegova udova Hasibahanuma rođena Hadžić iz Gračanice živi i sada u Sarajevu. Sin im Tajib ef. Okić zauzima visok položaj redovnog profesora hadis-skih nauka na univerzitetu u Ankari i poznat je kao pisac naučnih djela iz svoje struke.